

**TEKS UCAPAN  
YANG BERBAHAGIA  
PROFESOR DATUK DR. HAJAH ROZIAH MOHD  
JANOR  
NAIB CANSELOR UiTM**

**SEMPENA**

**MEMORANDUM PERSEFAHAMAN**

**ANTARA  
UNIVERSITI TEKNOLOGI MARA  
DENGAN  
SEKOLAH VOKASI UNIVERSITAS GADJAH MADA**

**20 SEPTEMBER 2023 | RABU | 4:00 PETANG  
ARAS 7, CANSELERI TUANKU SYED SIRAJUDDIN,  
UiTM SHAH ALAM**

***Bismillahirrahmanirrahim, Alhamdulillahi  
Robbil'alamin, Wassolatu Wassalamu 'Ala Asyrafil  
Anbiya'i Wal Mursalin, Wa 'ala Alihi Wasohbihi Ajma'in.***

**Yang Berbahagia Dr.-Ing Ir. Agus Maryono**  
Dekan Sekola Vokasi  
Universitas Gadjah Mada

**Yang Berusaha Profesor Dr Yamin Yasin**  
Rektor  
UiTM Cawangan Negeri Sembilan

Barisan Ahli Pengurusan UiTM dan Universitas Gadjah Mada, Para Tetamu Jemputan, serta hadirin yang dihormati sekalian.

**Assalamualaikum    Warahmatullahi    Wabarakatuh**  
**Salam Sejahtera**

1. Alhamdulillah, bersyukur kita ke hadrat Allah SWT kerana dengan izin dan limpah kurnia-Nya kita diberi ruang dan peluang untuk bersama-sama dalam Majlis Pertukaran **Satu Dokumen Memorandum Perjanjian (MoA)** antara Universiti Teknologi MARA dengan **Sekolah Vokasi Universitas Gadjah Mada, Indonesia.**

2. Terlebih dahulu, saya merakamkan ucapan terima kasih dan sekalung penghargaan kepada semua pihak yang terlibat secara langsung maupun tidak langsung dalam menjayakan Majlis MoA ini, terutamanya kepada pihak Sekolah Vokasi Universitas Gadjah Mada di atas kesudian menjalinkan kerjasama dengan pihak kami.
3. Saya juga ingin mengambil kesempatan ini untuk menzahirkan rasa penuh bersyukur dan sekalung apresiasi kepada semua yang terlibat terutamanya dengan rakan strategik antarabangsa dalam melaksanakan jaringan dan sinergi bersama ke arah hubungan yang lebih mantap.
4. Tahniah dan syabas juga kepada Kolej Pengajian Pengkomputeran, Informatik dan Matematik UiTM Cawangan Negeri Sembilan atas inisiatif kepada usaha murni kolaborasi ini.

**Hadirin yang dihormati sekalian,**

5. Sebagai sebuah institusi terbesar di Malaysia, UiTM memainkan peranan yang sangat signifikan sebagai platform percambahan ilmu menerusi pengajaran dan pembelajaran yang berasaskan keperluan semasa.
6. Oleh itu, adalah penting untuk kita memperkasa hubungan kerjasama antara universiti luar negara dari segi reka bentuk dan penyampaian kurikulum, penyelidikan serta pembangunan pendidikan yang berterusan ke arah melahirkan graduan profesional berkualiti.
7. Mengagumi pengalaman Universitas Gadjah Mada sebagai universiti tertua dengan pengalaman selama 74 tahun dan juga sebagai institusi pengajian tinggi terbesar di Indonesia, warga UiTM yakin kolaborasi ini bakal memberi manfaat kepada kedua-dua organisasi. Malahan pencapaian akademik luar biasa Universitas Gadjah Mada sehingga tersenarai sebagai *Top 300*

*Universities* telah menjadi inspirasi UiTM untuk menjalinkan kerjasama dua hala ini.

8. Alhamdulillah, pada tahun ini hubungan dua hala ini dikembangkan dan diperkuatkan lagi dengan Memorandum Perjanjian yang telah diusahakan oleh Pengajian Sains Maklumat, Kolej Pengajian Pengkomputeran, Informatik dan Matematik UiTM Cawangan Negeri Sembilan.

9. Pengalaman Sekolah Vokasi Universitas Gadjah Mada, Indonesia dalam inovasi pembelajaran dan pengajaran diharapkan dapat mencorakkan hala tuju aktiviti Memorandum Persefahaman yang bakal berlangsung bermula tahun ini sehingga 2026.

10. Inovasi Sistem Elektronik Pengurusan Fail Kursus (E-COF) yang dibangunkan oleh Kolej Pengajian Pengkomputeran, Informatik dan Matematik UiTM Cawangan Negeri Sembilan bagi menyelaraskan informasi bahan pengajaran adalah salah satu inovasi

berkualiti tinggi yang dihasilkan oleh pihak Kolej Pengajian dan telah memenangi Anugerah Johan Pertandingan Operational Excellence 2020 peringkat UiTM. Diharapkan jalinan kerjasama ini akan meningkatkan kuantiti dan kualiti inovasi kedua-dua organisasi ke peringkat yang lebih tinggi.

11. UiTM mencatat sejarah dalam *Malaysia Book of Records* dengan Penganugerahan Satu Juta Skrol, di Istiadat Konvokesyen Ke-97 pada Ogos yang lepas. Sebagai universiti awam terbesar di Malaysia dengan bilangan pelajar yang paling ramai, UiTM mengharapkan kerjasama persefahaman ini akan menyemarakkan usaha dan budaya inovasi dalam kalangan warga universiti ke arah kecemerlangan dan keberkesanan pengajaran, pembelajaran dan penyelidikan.

### **Hadirin sekalian,**

12. Saya berharap agenda yang telah direncanakan ini seiring dengan aspirasi UiTM ke arah menjadi sebuah

universiti dikenali dunia. Semoga sinergi kerjasama tanpa sempadan ini dapat menjana pengetahuan dan idea baharu ke arah ekosistem yang mampan. Manfaat bukan sahaja kepada semua pihak yang terlibat malah, akan memberikan impak positif dan berguna kepada masyarakat serta negara.

13. Akhir kata, saya sekali lagi mengucapkan ribuan terima kasih kepada pihak pengurusan tertinggi Sekolah Vokasi, Universitas Gadjah Mada dan semua yang terlibat atas inisiatif ini.

14. Semoga segala usaha murni kita ini akan berupaya meningkatkan produktiviti dan keseimbangan semua pihak, di samping mengukuhkan jaringan kerjasama antara universiti di Malaysia dan luar negara amnya. Insya-Allah.

**Sekian, Wabillahitaufiq Walhidayah  
Wassalamualaikum warahmatullahi wabarakatuh.**